

7  
c626/6.7.8.2.0  
LES PLAINTES  
DE MESSIEVRS LES  
princes au Roy contre la  
faueur de Baradas.

25.

1626.

CASE

THE UNIVERSITY

F

LIBRARY

39

326

1626/L



*Les plaintes de messieurs les princes  
au Roy contre la fureur de  
Barad as.*

**N** O V S auons veu quelques escrits, & on dit qu'il s'en prepare encore d'autres, pour refuter la doctrine & destruire les calomnies contenuës en ce mauuais liure, qui a esté publié depuis quelques mois sous le tiltre d'aduertissement au Roy. Mais si ie ne me trompe, il cache vn venin trop puissant pour en penser arrester les effectz par vne telle sorte de preseruatifs. Il en faut chercher d'autres.

Car que celiure ayt esté concerter, que ce ne soit l'ouurage, non d'un Docteur, ou d'un homme qui parle Latin, mais d'une cabale tres puissante, tres-artificieuse, & tres-agissante, qui a employé la plume la plus hardie de toutes celles dont on a accoustumé de se seruir en telles occasions, c'est chose, dont aucun de ceux qui se seront voulu tant soit peu donner la peine de considerer & remarquer le train des affaires du monde, ne scauroit douter. Toutesfois & quantes qu'il s'est brassé quelque grande coniuration, ou qu'il s'est tramé quelque dessein Tragique & pro-

digieusement funeste, on a veu de tels auant-  
coureurs : ce sont esclairs qui precedent ordi-  
nairement les foudres & les orages des calami-  
tez publiques. Les exemples n'en sont que  
trop frequens, & aucuns si recens que la pla-  
ye en seigne encore. Les manifestes des grands  
sont les deuanciers des troubles, emotions &  
seditions ciuiles : les escrits & declarations de  
ces Docteurs sont comme des cometes, que la  
plus profonde corruption & malignité de la ca-  
bale a accoustumé de pousser, & qui ne pres-  
agent rien moins, que les fureurs & horreurs  
les plus extremes, dont les Estats puissent estre  
affligez, si parvne sage preuoyance & genereu-  
se resolution il n'y est pourueu.

Le nom de Dieu soit beny eternellement  
de ce qu'il luy à pleu toucher l'esprit du Roy,  
& de ces ministres pour ne point negliger cet  
aduertissement. C'est vn argument infailible  
que la bonté diuine non seulement ne veut  
point que les pernicious desseins des ennemis  
du repo sde la Chrestienté reussissent, mais  
mesmes on veut empescher les progres à l'ad-  
uenir, si tant est que nous scachions bien &  
sagement vser des moyens, lesquels Dieu nous  
fait naistre pour cet effect dedans les conseils  
mesmes, & les menées artificieuses de nos en-  
nemis. C'est dequoy il faut dire quelque mot.

Ce liure selon que ie puis comprendre,  
semble auoir pour but de destourner le Roy  
des alliances & confederations, ausquelles on  
croit qu'il soit entré pour s'opposer aux vsur-

palement des discours de la Theologie, & des cas de consciences, quelques-vnes de ces considerations d'Estat, mais qui ont passé par le mesme alambic. Or quant à ces subtilitez de l'eschole, & à toutes ces intrigues d'estude & de liures, ie les laisseray demesler à ceux qui s'y entendent, & ne m'arrestteray qu'à ce quel v'sage, & quelque peu d'experience m'a fait comprendre de telles sortes d'affaires dedans le cours du monde.

I'ay donc dit que l'auteur de ce pernicieux liure semble d'un premier œil n'auoir autre dessein que de separer le Roy d'avec ses alliez; mais en considerant son discours entier, il est aisé de iuger que son intention n'est point d'en demeurer là, & qu'elle passe bien plus anant, qui est ietter le trouble & la combustion dedans le Royaume, exciter l'ambition audacieuse de ceux d'entre les Grands, qui ne se peuvent accommoder aux loix d'une iuste domination, faire souleuer tous les Ordres du Royaume, que l'on veut interesser par ce discours malicieux, & qui pis est. Mais Dieu maudira ces execrables intentions, & conseruera la personne Sacrosaincte de son Oinct.

Or que le but & le dessein de ceste cabale soit tel par ce malheureux escrit, il ne faut point estre fort clairvoyant pour le iuger ainsi. Les principaux moyens dont les factieux, les broüillons, les ennemis conjurez d'un Prince se seruent pour troubler ou empieter son Estat, sont de le ietter dedans la haine & le mespris; la haine fait que l'on veut, & le mespris que l'on ose



entreprendre contre luy, se soustraire à sa domination, & secouër le joug de son autorité. Ce sont les fondemens sur lesquels fut bastie ceste furieuse Ligue, qui a pensé engloutir cét Estat, & le liurer à vne domination estrangere, & sur lequel generalement toutes les grandes factions, conjurations, & rebellions qui furent iamais ont esté appuyees.

Que disoit-on contre Henry III. autre chose, sinon ce que ce maudit escriuain ose publier aujourd'huy autant meschamment que fausement contre nostre Roy tres-Chrestien? Qu'il fauorisoit les Huguenots; Qu'il vouloit laisser tomber la Couronne entre les mains d'un Prince heretiqué; Qu'il mettoit la Religion en hazard d'une totale subuersion; Que tous les Ordres & Estats du Royaume gémissoient sous l'oppression des charges qu'on leur imposoit tous les iours, & autres semblables calomnies execrables, par lesquelles ces meschans ietterent ce bon Prince dedans la haine de ses sujets ignorans & mal-aduisez, & quant & quant dans le mespris, le depeignans comme le ioliet de deux ou trois mignons & mauuais Conseillers, qui abusoient de la simplicité de son innocence.

N'est-ce point la mesme chose que la cabale ennemie de la France tasche de faire, non par la plume de ce Docteur seulement, mais par mil autres artifices plus sourds, plus secrets, mais autant meschans & pernicioeux?

Cét escrit menace il point ouuertement le Roy d'une rebellion des Grands & des princi-

paux de son Royaume, & d'un souleuement de  
 ses peuples ? Bref, le menace-il point en ter-  
 mes fort clairs du retour de la Ligue ? N'a-il  
 point l'effronterie de dire, *Que les Grands du*  
*Royaume portent avec impatience & tres-grand des-*  
*plaisir que par la depravation de peu de personnes,*  
*ce Royaume recoiue vne telle sache, que d'assister les*  
*heritiers sous vn si bon Prince : mesmes que les vil-*  
*les, & tous les peuples Orthodoxes crient ouueriement*  
*contre le Conseil du Roy, tellement qu'il est à craindre*  
*que ce qui est aduenü il n'y a point si long temps, (c'est*  
*à dire, la Ligue & les horreurs, les particides, les*  
*execrations qui l'ont accompagnées) n'aduier-*  
*ne encor.*

Mais ie dis davantage. C'est que iamais les  
 partisans de la Ligue, iamais les Docteurs, ny  
 ceux d'entre les Iesuites, qui l'ont enfantee,  
 nourrie & esleuee, ne passerent si auant que  
 fait aujourd huy ceste cabale. Ils ont bien dit  
 & enseigné, tant en leurs chaires, & par leurs  
 eserits publiquement, qu'en particulier es con-  
 fessions, *Qu'il est non seulement loisible, mais meri-*  
*toire de se souleuer contre vn Prince Tyran, ou qui*  
*fauorise l'heresie, qu'un Prince excommunié n'est plus*  
*Prince, & que ses subjects sont desliés du serment*  
*de fidelité; & partant luy peuent resister par armes,*  
*le chasser, le deposseder, voire s'en deffaire par toutes*  
*sortes de moyens les plus execrables, fust-ce par poison,*  
*qui est vne question que le Iesuite Mariana, du*  
*quel le nom doit estre en execration, a trai-*  
*cté tout au long en vn chapitre expres; mais*  
*qu'aucun d'eux ait dit, Que les Princes ou Grands*  
*d'un Esar, qui continuent lors que le souverain se li-*

*gue avec des heretiques contre des Catholiques, pe-  
chent mortellement: Qu'un Roy qui fait la guerre à  
des Catholiques, & introduit l'heresie es pays d'au-  
truy, soit excommunié ipso facto: Que ceux qui  
lay conseillent cela, ou qui l'assistent, soient compris  
sous la mesme censure, c'est ce que ie n'estime  
point auoir esté cy-deuant escrit.*

Et à la verité, il n'est point possible d'exco-  
giter vne doctrine plus furieuse, plus esloignée  
de la profession du Christianisme, ny plus pro-  
pre à bouleuerfer tous les Estats, que Messieurs  
les Docteurs, c'est à dire, ceux qui se seruent  
de leurs plumes & de leurs langues voudront  
entreprendre. Car si lors qu'on a dit & ensei-  
gné qu'il est loisible de se departir de l'obey-  
sance d'un Prince qui assiste l'heresie, & que  
quelques-uns ont encor adousté, que c'est cho-  
se meritoire: Cette doctrine a produit des ef-  
fects si abominables, que ne fera-elle point au-  
iourd'huy, que l'on passe encor plus auant par  
ce detestable escrit? *Que les Princes qui conuiuent  
à cela, que ceux qui y adherent, ou qui assistent le Prin-  
ce qui a un tel dessein, pechent mortellement, c'est à  
dire, sont damnez eternellement.*

Que si ceste doctrine prenoit racine, si  
elle s'autorisoit parmy les peuples, quelle  
seureté y auroit-il pour les Princes? Car qui  
est le Prince si zélé, si deuotieux, si religieux  
soit il, que la cabale ne puisse faire declares  
fauteur d'heretiques, quand la fantasie luy en  
prendra, & quand ses desseins le requerront?  
Nous en voyons l'exemple en ce detestable li-  
ure, outre celuy que l'histoire de Henry III.

Prince



Prince tres-deuot & tres-grand zelateur de la Religion Catholique, nous fournit & à nostre posterité à iamais.

Il est donc vray que tout le suc de ce qui a iamais esté presché, escrit, enseigné, publié de plus pernicieux deuant & durant la Ligue; que tout ce qui a encor esté escrit de plus horrible sur d'autres sujets par les Iesuites Emanuël Sa, ribadenera, Creusuel, Mariana, Suares, Gretser, Eudamon, Ioannes, & autres semblables, se trouue espreint dedans ces trois ou quatre feuilles de papier; & non seulement cela, mais qu'il y a encor quelque chose de plus, & que l'auteur de cét abominable escrit appelle ouuertement la sedition, la rebellion, les conjurations & conspirations contre la personne Sacro-saincte du Roy; qu'il conuie à cela tous les Grands, les mediocres, les petits, & tous les Estats du Royaume, voire qu'il les y veut obliger sur peine de damnation eternelle, au lieu que les autres s'estoient contentez de leur promettre Paradis, en faisans des actes si approchantes de l'enfer.

Mais que faut-il faire à cela? quels moyens y a-il de conjurer ceste tempeste, & de preuenir tous ces mauuais desseins? Certes il y en a plusieurs, & que l'on trouuera fort aisez, & quant & quant fort asseurez, si on se veut donner la peine d'y penser tant soit peu, & l'affaire le merite bien.

Premierement donc ce qui a esté fait par le Magistrat, pour la condamnation de ce liure, a esté fait tres-prudemment & tres-sagement.

Car par là on void non seulement quel est le sentiment de ceux à qui l'administration de la iustice est commise, mais encor quelle est leur affection au service du Roy, & quant & quant leur courage; ce qui peut grandement servir à fortifier les gens de bien, & arrester les pernicious intentions des autres, quand ils verront quels sont les sentimens de ceux, qui à cause de leurs charges ont la principale autorité parmy les peuples. La censure de la sainte Faculté de Theologie a esté aussi publicee tres à propos, & est digne de la pieté & deuotion de ceste venerable compagnie. Que si Monsieur le Procureur general trouuoit bon de faire adjoûter encor à cela vn Arrest du Parlement, il semble que la chose n'en seroit que plus autèntique, plus solemnelle, & plus autorisée.

Car quant aux liures que l'on publie contre ceste doctrine, on me pardonnera si ie dis que ie ne sçay si on en doit esperer tout le fruit qu'on s'en eust peu promettre. A quel propos faire des liures pour refuter vne doctrine qui a desia esté tant & tant de fois condamnée, & qui est en abomination à tous les gens de bien? A quel propos reduire aux termes d'une controuerse, ce que non seulement les loix définissent pour vn crime execrable au dela de l'execration, mais qui est abhorré mesmes par les propres sentimens de la nature. Que si des bandouilliers, des guetteurs de chemins, des escumeurs de mer, faisoient des manifestes pour autoriser l'exercice de leur mestier, s'amuseroit-on à leur faire des responses?

Je diray plus, ceux qui font ces malheureux liures, tels que celuy qui nous fait parler, viennent preparez à cela, dressent leur chemin de longue main, preparét leurs matériaux, & après tout cela y apportent vne audace digne de leur resolution. Et ie ne sçay comment il aduient quelquesfois que ceux qui se donnent la peine d'y faire des responses, n'apportent à cela, ny tant de courage, ny tant d'ardeur, soit que la probité ne soit point si agissante ny si vehemente que la scelaretesse; soit qu'ils craignent de tomber tout à fait dedans la haine & la rage de ceux qui sont interessez.

Mais pour venir au poinct, i'estime que le vray preseruatif & contre-poison contre vne telle sorte de doctrine, consiste en deux ou trois choses principales; En la bonne nourriture & instruction que l'on donne à la ieunesse; En la bonne conduite & saine doctrine des Pasteurs de l'Eglise; & en l'exacte execution des loix de l'Estat.

Quant au premier poinct, il a desia esté obserué par des grands Politiques & gens d'Estat, que c'est en quoy on erre presque ordinairement, & d'une erreur tres-prejudiciable, & qui tire apres soy toutes sortes d'autres erreurs: car qui faut aux principes & aux fondemens il faut en tout. Mais d'autant que l'on ne se represente en cela que des enfans, que des escholes, que des Maistres és Arts ont estimé que c'est peu de chose, & qui ne merite point tant de soin: mais les grand Politiques, qui considerent les choses dedans leurs sources, & qui en preuoient les



progrez, en iugent bien autrement.

Ie ne veux point m'estendre en vn long discours là dessus, ny entreprendre sur le mestier des Maistres; ie me contenteray de demander qui auoit armé la main & le courage de ce monstre de Iean Chastel, qui en l'aage de dix-neuf ans pensa donner le coup de la mort à la France, que Dieu auoit preseruee contre tant & tant de si puissantes armées? Il n'y a personne qui ne doie aduoüer que la doctrine qu'il auoit apprise au college des Peres Iesuites, & qui luy auoit esté inculquée dès sa ieunesse, auoit fait ceste malheureuse operation.

Et puis nous negligions les loix concernant l'institution de la ieunesse, mais qui pis est (& qui ne se scauroit iamais excuser, ie ne diray point en bonne politique, mais dedans la ration-cination ordinaire, & presque dedans le sens commun) nous les destruïsons, nous les foulons aux pieds, & commettons l'education de ceux qui doiuent vn iour remplir toutes les places, toutes les charges de nostre Estat, à des gens qui font profession toute ouuerte d'enseigner vne doctrine si contraire à l'ordre que Dieu a estably pour la conduite du monde, si ennemie des loix publiques, & des dominations legitimes: vne doctrine qui soustraiet les subjects à leur Prince, qui les arme contre luy, qui leur fait reclamer la protection d'un autre, & finalement qui leur met le cousteau, le feu, le poison en la main.

Et cela estant, deuons-nous croire que des plantes nourries dedans vn terroir si gâté & si



infect, esleues dedans vn air si corrompu, & parmy des exhalaisons si pestiferees, arrousees de telles horreurs & abominations, puissent produire d'autres fruiçts que ceux que nous auons desia commencé d'en cueillir? Lotié soit le grand nom de Dieu, qui a chāgé, ou du moins amorty la nature des choses, & empesché que le mal fust tel iusques à present, que la raison & l'ordre des causes sembloit le deuoir faire naistre: Nous deuons cela à la seule misericorde de Dieu, qui a eu pitié de nostre imprudence; mais il n'est point question d'abuser tousiours de ses graces.

Or pour clorre ce poinçt, ce que i'ay à dire est en vn mot, qu'il faut tenir, non pour vne maxime d'Estat, mais pour vn Oracle, *que l'vn des grands & principaux moyens de maintenir vn Estat, & contenir des subjects dedans le respect, l'obeyssance & la fidelité est de donner ordre qu'ils soient nourris & esleuez dès leurs ieunes ans en la doctrine & discipline qui est conforme aux loix de l'Estat.* Nous pouuons iuger si nous auons failly contre ce principe, & si nous y faillons tous les iours, & est bien aisé de iuger aussi ce qu'il faut faire pour reparer ce ste faute.

I'ay dit que le preseruatif contre vne doctrine si pestilente, consiste encor en la conduite des Pasteurs de l'Eglise: car puis qu'ils ont la direction des ames & des consciences, il depend d'eux de les adresser au vray chemin de la pieté enuers Dieu, de la veneration enuers les puissances establies de Dieu, & qui portent son caractère, & de la charité enuers leur patrie & leurs

concitoyens, comme aussi il depend d'eux mesmes de leur faire prendre des chemins contraires, pour en les iettant dedans les horreurs qui suivent ordinairement les rebellions, les precipiter quant & quant dedans les abysses de perdition.

Il ne faut point de discours pour cela, & ne faut point remonter iusques aux siecles passez, qui sont pleins de tels exemples, nous n'avons qu'à repasser par nostre memoire ce que nous avons veu en nos iours.

Car qui ne sçait par qui la Ligue a esté noïee, soustenuë, estayee, entretenue? Qui ne sçait par qui, & comment les esprits des peuples auoient esté desbauchez, enchantez, enforcelez? Mais qui ne sçait encor par qui ces monstres, que l'enfer auoit vomy & ietté sur la face de la terre, auoient esté animez & inspirez pour attendre des execrations auparauant presquez inouyes.

Ne nous souuenons-nous point des predications furieuses, des liures damnales & abominables, que l'on publioit tous les iours auparauant le detestable parricide commis en la personne du Roy Henry III? Ne sçauons-nous point ce que confessa ce miserable Pierre Barrieres en l'an 1593, touchant les exhortations qui luy auoient esté faites par certains Ecclesiastiques, & particulièrement par le Pere Varade Recteur des Iesuites à Paris? Mais finalement, ne nous souuenons-nous point des mauuais liures qui furent publiez par le Iesuite Scribanus, & autres; des predications plus que sediti-

teuses qui furent faites publiquement en vne des grandes parroisses de ceste ville, quelques mois auparauant ceste miserable & plus que funeste iournee, qui se vit raur le plus grand Prince qui eust porté le sceptre de nostre Monarchie.

Or tout cela estant notoire à tout le monde, il n'y a personne qui ne se perde & ne s'esgare en la consideration des choses qui se sont passees au gouvernement de cét Estat, depuis tous ces accidens espouuentables, qui sembloient suffisans pour instruire les plus stupides, & ie ne scay par quel malheur ils n'ont seruy qu'à nous faire perdre ce qui nous pouuoit rester de sens, & à nous rendre plus insensibles qu' auparauant.

Après l'exectable attentat commis par Iean Chastel, le Parlement remply de grands personages, qui auoient si dignement & vtilement seruy le Roy, estima que ce n'estoit point assez d'employer tout ce qui se pouuoit excogiter d'atroce pour la punition du scelerat qui auoit presté sa main à ce detestable acte, mais qu'il falloit faire plus que cela, oster la premiere cause, & combler la source d'où procedoient detels horreurs, elle ordonna donc, *Que les Prestres & Escoliers du College de Clermont, & tous autres soy disans de ladite société, comme corrupteurs de la ieu nesse, perturbateurs du repos public, ennemis du Roy & de l'Estat vuideroient hors du Royaume, avec des fenses à tous subjects du Roy d'envoyer des escoliers aux Colleges de ladite société, qui sont hors du Royaume pour y estre instruits, sur peine de crime de leze Majesté.*



Cela auoit esté aussi sagement & sainctement ordonné, que iustement executé. Les affaires qui suruindrent depuis, & par lesquelles on obligea le feu Roy à rechercher les moyens de trouuer grace à Rome, la poursuite de sa reconciliation, de la dispense du mariage de Madame la Duchesse de Bar sa sœur, & autres tels affaires, donnerent moyen aux ennemis de cét Estat, qui portoient avec impatience d'auoir perdu vn tel aduantage, de pratiquer artificieusement vers le S. Pere qu'il moyennast le retour de ces gens cy; de sorte que le Roy ne requeroit rien du S. Pere, que quant & quant on ne pressast le reſtabliſſement des Iesuites, & la publication du Concile de Trente.

Il est vray qu'il y auoit lors des grands hommes, & affectionnez à ceste Couronne, qui manioient nos affaires de ce costé là; mais outre qu'aucuns d'eux ayans passé vne bonne partie de leur vie dedans l'air, les mœurs, & les façons de viure de la Cour de Rome, & n'estoit point possible qu'ils n'en eussent retenu quelque chose, aussi est-il vray, qu'excellens principalement en la cognoissance de ces affaires-là, ils auoient interest pour se maintenir necessaires au seruice du Roy, de ne rien diminuer de l'opinion qu'on auoit de longue main, & qui auoit esté soigneusement, & quelquesfois artificieusement entretenue, que sur toutes choses il falloit pouruoir d'estre bien à Rome; opinion qui n'est que bonne, pourueu qu'elle soit bien mesnagee, & qu'on en conserue quant & quant vne autre, qui est, que puis que nous iugeons que la faueur de



de la Cour de Rome nous est nécessaire pour le bien de nos affaires, & pour le repos de la Chrestienté, si la malice & les menées de nos ennemis preualoient en telle sorte, que pour estre bien à Rome, il fallust estre mal dedans nostre Estat, y admettre des traistres, des espions, des boute-feux, & quant & quant y ietter & entretenir la guerre & combustion ciuile, souffrir que nos ennemis y enuoyēt des colonies, & y bastissent des citadelles; en ce cas ce seroit à nous à aduiser ce que nous aurions à faire. Or il se fait aussi souuenir d'une autre maxime, qui est non seulement fondée en très-grandes raisons, mais encor approuuée par infinies experiences, que tant que nous aurons dequoy estre en consideration par nos propres forces, & par la puissance de nostre Estat, nous serons tousiours très bien à Rome; & que ceste Cour, sage & aduisee par dessus toutes les autres, sçaura bien accommoder ses interets aux nostres.

Or le feu Roy estant importuné à toutes heures, & à chaques depesches qui venoient de Rome, de reestabliir les Iesuites, non obstant l'Arrest de son Parlement, sur les assurances d'aillieurs qu'on luy bailloit de leur fidelité à l'aduenir, il se laissa emporter à ceste violence d'importunité; & faut aduouër que c'est peut-estre la chose en quoy la prudence & la bonté d'esprit de ce grand & excellent Prince a le moins rencontre. Ce qui a suivy ce reestablisement, explique assez ce que ie veux dire.

Il n'y auoit personne non intéressée, & qui eust les sentimens François, qui après ce mal-

heureux euenement, qui a conuert la France de miseres, n'en deschargeast son cœur. Les Parlemens, & particulièrement le Parlement de Paris, se firent entendre là dessus : Tout le monde croyoit qu'il falloit pouruoir à l'aduenir ; mais les apprehensions que quelques-vns eurent de rien remuer en vn Estat desia esbranlé, & les interests de quelques autres, qui pensoient plus à leur establissement, & à conseruer & accroistre l'autorité dedans laquelle ils se trouuoient, qu'à affermir l'Estat à l'aduenir, furent cause que non seulement tous les cris des gens de bien se trouuerent vains & inutiles, mais mesmes qu'ils furent imputez à crime, & que l'on n'osoit s'attacher aux autheurs de ceste maudite doctrine, que sous des masques & des noms desguisez, & quant à eux ils triomphoient de tout le monde ; ils aduançoient aux honneurs, ou en esloignoient qui bon leur sembloit ; ils persecutoient ceux qu'ils estimoient n'estre point de leurs amis, ou leur faisoient bailler des commissions à Rome, dont l'execution dure encor : bref ils gouernoient tout, & est vray que iamais les Pharisiens n'eurent tant de pouuoir en Hierusalem apres la mort d'Alexandre Roy de Iudee, que les Iesuites en vsurperent en ceste Cour apres la mort du feu Roy.

La Regence estoit entre les mains d'une aussi sage, aussi genereuse, aussi vertueuse Princesse qu'il y en eut iamais. Mais elle croyoit conseil. Elle auoit trouué des grands hommes dedans les affaires, les vns choisis, les autres conseruez & retenus par le feu Roy, il falloit qu'elle

suivent leurs aduis; & quant à eux ils se trou-  
voient bien empeschez, & tous changemens,  
tous remuemens leur faisoient peur, & non sans  
cause; de sorte que s'ils ont relasché quelque  
chose en faueur de ces importuns, cela ne peut  
estre imputé à defaut de fidelité, mais au mal-  
heur du temps: & faut aduoüer que si l'Estat  
eust esté entre les mains de ministres autant ap-  
prehenifs & consideratifs qu'eux, mais moins  
adroits, ces allans s'en fussent bien fait plus à  
croire, & se fussent rendu maîtres de tout. La  
grande moderation, & l'excellamment bon na-  
turel de la Royne Mere, & la dexterité de quel-  
ques vns de ses Ministres, ont apporté vn grand  
retardement aux violentes entreprises de ces  
gens-là. Et toutesfois il faut aduoüer qu'ils  
n'ont point laissé de beaucoup faire, & infinie-  
ment plus qu'il n'estoit expedient pour le bien  
de cét Estat. I'ose dire (& ie m'assure que tou-  
tes personnes bien senees & non interessees,  
qui se voudront donner la peine de penetrer iuf-  
ques aux premieres causes de ce qui s'est passé  
depuis quelques annees en ce Royaume, en  
tomberont d'accord avec moy) que les plus  
grands maux, dont cét Estat a esté affligé de-  
puis le deceds du feu Roy, sont procedez prin-  
cipalement du grand & excessif pouuoir que  
cette compagnie a vſurpee depuis son resta-  
blissement.

Et aujourd'huy, où en sont ceux d'entre eux  
qui se sont deuoiéz à la faction ennemie du re-  
pos de la Chrestienté? Que n'entreprennent-  
ils point? mais que ne machinent ils point. Ce



maudit liure, qui a donné sujet à ce discours, le tesmoigne assez, & le publie haut & clair.

Car de nous vouloir dire qu'ils n'y ont point de part, que l'autheur n'est point de leur société, ce sont caillations bonnes pour amuser des gens de village, mais qui ne doiuent point trouuer de prise parmy des gens d'Estat, dedans le Conseil d'un grand Roy, veu que des simples gens d'estude s'en sçauēt si bien demesler, ayans monstré & par la conformité de la doctrine contenüe en ce liure, avec celle qui a esté publice par tant & tant d'autres liures des Iesuites, & par la conformité du stile avec celuy dont vn de leurs plus enragez peres a cy - deuant traicté en semblables matieres, que ce liure ne peut estre procedé d'autre boutique.

Mais si cela n'est point, s'ils n'approuuent point ceste malheureuse doctrine. Pourquoi n'escriuent-ils à l'encontre, pourquoy ne publient-ils quelque chose solennellement pour execrer ce detestable liure; pourquoy souffrēt-ils que d'autres entreprennent cét ouurage? C'est la seule responce qu'ils ont à faire aux plaintes que l'on fait d'eux; C'est la seule Apologie qu'ils peuuent faire publier pour leur defense; & s'ils le faisoient de bonne grace, sans dol, sans equiuoques, ie serois le premier qui me departirois de l'opinion, que leur silence en cét affaire, joinct à leurs actions precedentes, m'a fait conuenir d'eux.

Or cela estant, iugeons si l'on doit donner tant de pouuoir, tant de credit, tant d'autorité à ces Messieurs pour la direction des ames;



si on leur doit donner les chaires de toutes les principales Parroisses; si l'on doit donner des charges & dignitez Ecclesiastiques, ou autres, à leurs suffrages & recommandations: bref si on les doit approcher si pres des personnes Sacrosainctes. Ceste seule proposition contient sa response, & quant & quant nous charge d'un blasme eternal, si nous continuons à nous laisser enuolopper dedans ce labyrinthe d'erreur.

L'ay dit que pour parachener nostre preseruatif, & le rendre parfait, il est necessaire de pouruoir que les loix concernans la seureté de l'Estat, soient bien & fidellement executees: ie crois que personne ne doutera de ce principe, & ie ne sçay toutesfois s'il y en a aucun auquel on peche dauantage.

Les Loix en soy ne sont que des mots & des paroles inanimees, qui n'ont leur vie que dedans l'execution, qui doit proceder de ceux à qui elle est commise. Le souuerain fait les loix, & quant à l'execution il l'a laisse à ses Officiers & Magistrats. Il dépend donc d'eux de les executer, si tant est que leur pouuoir ne soit point arresté par vn autre plus puissant.

Or voyons si en cela on a tousiours suiuy la regle. Ce que nous auons touché cy-deuant dit tout le contraire.

Et premierement, y eut-il iamais loix, ie ne diray point plus mal obseruees, mais plus violemment enfreintes, que celles qui concernent le repos de l'Estat, l'obeyssance deuë au Roy, voire la seureté de sa propre personne?

Lors que les Iesuïtes voulurent s'establi-

l'Vniuersité de Paris s'y opposa. Ceste opposition fut plaidee au Parlement, où des grands Officiers & fidels à leur Prince, monstrenterent que cét establissement estoit contre les loix de l'Estat, & que s'il estoit iamais permis, il seroit suiuy de tres-grands inconueniens. Tout cela ne seruit que de propheties, lesquelles ayans esté accomplies à nostre grand mal-heur, & le Parlement ayant donné vn Arrest digne de sa Iustice & de sa fidelle deuotion au seruice du Roy; cét Arrest a-il point esté ruiné, cassé, & aneanty, non par les voyes de droict, mais par les menees & artifices de la cabale ennemie de cét Estat?

Or cela ayant esté suiuy de l'horrible mal-heur que les gens de bien presageoient dès lors, si estoit-il temps de recognoistre les premieres fautes, & d'estre plus aduisé à l'aduenir. S'estant donc meuvne nouuelle contention entre l'Vniuersité & les Iesuites, fut donné vn autre Arrest solemnel, les parties ayans esté plainement ouyes, qui estoit suffisant pour clorre la bouche à iamais à des gens qui eussent eu le moindre reste de pudeur, & cependant on sçait ce qui s'est passé, & comment.

Mais passons plus auant. Car si on doit iamais exercer la seuerité des loix, mesmes si on la doit estendre & augmenter, c'est lors qu'il s'agit de la punition d'un crime de leze Majesté au premier chef. Et neantmoins, ô Dieu, ie suis contrainct de m'arrester sur ce point! La posterité ne me croiroit pas, & ie n'ay point de paroles pour signifier ce que ie veux dire. Et que pou-

uons nous attendre d'oresnauant de ceux à qui la distribution de la iustice est commise? Car n'est-ce point leur dire (ie ne scay si en bon François, mais certes en termes fort intelligibles) que quand il sera question de faire le procez à vn coupeur de bourse, ils pourront exercer la seuerité des loix; mais lors qu'il sera question de punir vn assassinat, vn parricide, si les Iesuïtes s'interessent en cela, il se faudra bien donner garde d'y toucher?

Mais disons dauantage, au train que les Iesuïtes prennent, peut-on attendre autre chose à l'aduenir, sinon vn entier aneantissement des loix & de l'Estat, voire vn establissement de loix toutes contraires? Il y a infinies raisons pour cela.

Et premierement ce grand & prodigieux pouuoir qu'on leur a laissé prendre, & qui croist tous les iours, est tel, que si quelqu'un aspire à quelque charge éminente, il faut nécessairement qu'il ait recours à eux, il les faut reblander, autrement ils ont mil moyens pour l'en esloigner; & si apres en estre pourueu, il pense reprendre le droict chemin, ils trouveront mil autres moyens pour l'en chasser, ou du moins luy en donneront ils tant d'apprehensions, que pour s'affeurir il sera contraint de faire le vœu d'obedience auengle.

Et ces difficultez se rencontrent par tout: car il n'y a sorte d'establissement, il n'y a sorte de charges & d'offices dont ils ne s'entremettent. Le Roy veut-il establir vne Chambre de Iustice, pour la recherche des maluersations

commises au faict de ses finances? vous voyez ces gens se remuer? vous les voyez trotter, vous les voyez assieger le cabinet. Vn tel n'y doit point estre employé, il n'est point bon Catholique, & pourquoy? d'autant qu'il n'a point esté de la Ligue, qu'il demeura fidel au Roy Henry III. & à son successeur Henry le Grand; qu'il croit que le Roy ne peut estre depossédé par le Pape; qu'il abhorre la doctrine des assassins & des parricides: Bref qu'il demeure attaché à la doctrine de Moyse, & rejette celle des Pharisiens. Vn tel doit estre employé, il est bon Catholique. Et dites-moy, mes Peres, qu'est-ce qu'estre bon Catholique en vostre Calepin, ou au iargon de vostre Aduocat? Dieu nous vueille bien garder de tels bons Catholiques.

Et neantmoins c'est de telles gens qu'ils taschent de remplir toutes les charges à l'aduenir. Ils se sont saisis presque de toute la ieunesse en toutes les villes du Royaume, qu'ils nourrissent plus soigneusement en leur pernicieuse doctrine, qu'en la cognoissance des lettres. Or quand des gens ainti nourris seront employez aux charges & aux offices, ie vous laisse à iuger que deviendront les loix de l'estat.

Ouy, mais tout ce que nous disons sont paroles de pleureurs, qui ne seruent qu'à faire voir le mal, mais où sont les remedes?

Certes la cognoissance de ceste sorte de maladie emporte quant & quant la cognoissance des remedes. Il ne faut autre chose que faire tout le contraire de ce que nous auons fait iusques à present.

Pour



Pour donc aller par ordre, reſtablir l'Vniuerſité, & y appeller des gens ſçauans de toutes parts? conſeruez, voire amplifiez ſes priuileges, conferez les charges & dignitez Eccleſiaſtiques, non à ceux qui vous ſont recommandez par les Ieſuites, mais à ceux qui ſont recognus pour gens de bien; approchez pres de la perſonne du Roy, des bons Prelats, des bons Docteurs, inſtruits & eſleuez en la doctrine qui aſſubjettit les ſubjects aux puiffances ſuperieures eſtablies de Dieu; donnez les grandes charges & magiſtratures, non à ceux que les Ieſuites, ou leurs partifans en iugent dignes, mais à ceux qui avec leur ſuffiſance ont conſtamment teſmoigné leur zele, leur courage, leur affection au ſeruice du Roy, & au bien de ſon Eſtat: En vn mot, *Rendez le corps des gens de bien, & attachez au Roy & à ſa Couronne, plus puiſſant, plus fort, plus autoriſé que la cabale des meſchans, ou des ignorans, qui eſt le plus grand ſecret dont vous vous puiſſiez ayder pour la reſtauration de cét Eſtat.*

Ouy, mais il faut du temps pour cela, cependant ceſte cabale pourra faire quelque mauuais effect, mettre le Royaume en trouble, excitant les eſprits mal contens, dont il n'y a iamais que trop en vn grand Eſtat; remuant les anes bigottes & ſuperſtitieufes, & les ralliant & liant enſemble: bref, faiſant ce que telles gens ont accouſtumé de faire, & qu'ils ont fait autres fois, comme ils nous en menaſſent tout ouïement par ce liure. Eſt-ce donc point le meilleur & le plus ſeur de leur donner cōtētement,

& les auoir pour affectionnez? Et cela se peut-il point faire, en procurant en toutes façons l'auancement de la Religion Catholique, à quoy mesmes nous sommes obligez par le deuoir de la conscience? Certes c'est icy le grand point, c'est la pierre où tant de gens ont choppé iusques à present.

Nous voila donc reduits à ce compte, à prendre party avec ces gens-là, ou contre eux; il n'y a point de milieu. Et quand ie dis prendre party avec eux, c'est à dire, nous assubjectir à eux, prendre la loy d'eux, faire ce qu'ils nous prescriront. Or ils ne nous prescriuent que deux choses pour ceste heure; d'abandonner nos alliez, & les laisser opprimer par la puissance d'Espagne, & d'exterminer les Huguenots de nostre Estat. Voila les conditions de nostre accommodement: car quant à la premiere, c'est le tiltre du liure, & quant à l'autre, elle y est assez exprimée en diuers endroits, c'est à nous à iuger si nous deuons tascher d'acquiescer la bonne volonté de ces Messieurs à ces conditions.

Mais certes en cét endroit la patience m'eschappe. Et quoy? faut-il donc que nous receuions la loy de Messieurs les Docteurs? faut-il que nous la receuions d'Espagne? faut-il que nous la receuions de Rome mesme. pour ce qui concerne les affaires de nostre Estat? Et cela estant, respirôs nous encor vn air libre & François? viuons nous encor sous les loix de France? L'autorité de nostre Roy est-elle entiere, souveraine, absoluë? Vous quitterez vos alliez, vous laisserez enuahir vos voisins, enclorre vo-

stre Estat de toutes parts, vous ietterez le flambeau de la guerre ciuile dedans tous les coins de vostre Royaume, pour l'embrafer & reduire en cendre: vous mettrez le fer entre les mains de vos subjects pour s'esgorger, s'exterminer les vns les autres: bref, vous rassemblerez & amasserez dedans vostre Estat toutes les miseres, les calamitez, les horreurs, les execrations dont vn Royaume peut estre affligé, & apres cela on vous laissera en paix. Effrontez, à qui vous adressez vous, pour donner de telles conditions de paix? au Roy de France, au Roy tres-Christien, pere de son peuple, protecteur de ses subjects, & qui vous perdra, quand il l'entreprendra à bon escient.

Or voyons ce qui nous peut arriuer de ce bel accommodement. I'en ay desia touché quelque chose, mais il faut passer plus auant.

Vous ne deuez point, disent ils, vous allier avec les Heretiques. Qu'est ce à dire, s'allier avec les Heretiques? adherer à leurs heresies ou à leurs opinions au faict de la Religion? Si cela est, nous sommes d'accord avec vous: mais si s'allier avec les Heretiques, est entrer en confederation avec eux pour nostre defense commune contre les entreprises d'un conquerant imaginaire, que ses faux prophetes appellent dès il y a si long téps à la Monarchie vniuerselle de la Chrestienté. Où auez-vous appris, Messieurs nos Maistres, en quelle Bible, en quelle Euan-gile auez-vous leu que cela soit deffendu? où en est la prohibition? Car quant à vostre exemp'e du Roy Iosaphat, qui s'estoit allié avec vn Prin-



ce ennemy de Dieu, sans necessité, pour entreprendre vne guerre en laquelle il n'estoit point interessé; contre vn Prince Payen, il vous y a esté respondu par des plus grands Clercs que moy, & qui vous ont seruy d'autres exemples, & en grand nombre, desquels d'autres s'estoient desia aydez pour response aux calomnies contre le grand roy François, par lesquels ils vous ont appris qu'il est loisible, & que c'est chose qui a tousiours esté pratiquée par le peuple de Dieu, de se liguier & s'vnir avec des Princes & Estats, quoy que Payens & idolâtres, pour se garantir de l'oppression d'un plus puissant ennemy.

Mais mettant à part ces disputes, voyons vn peu à quel ieu ces Messieurs ioient, & ce qui reüssiroit de ceste belle doctrine, si elle estoit autorisée.

Et premièrement, ie dis qu'il n'y auroit point vn plus beau moyen pour ouurir la porte aux Turcs, & aux infideles dedans la Chrestienté. Car, qu'ils viennent assaillir la Hongrie, qu'ils se iettent dedans l'Autriche, qu'ils passent plus auant dedans l'Allemagne, il faudra que l'Empereur, les Princes Catholiques se donent bien garde de recevoir avec eux les Princes Protestans pour leur defense commune. Si (pour exemple) le Roy de Suede est attaqué, si le Duc de Saxe, il se faudra bien donner garde de les secourir, & les faudra bien laisser enuahir pour les Turcs. Pourquoi? d'autant qu'il ne faut point auoir d'alliance, ny ioindre ses armes avec les heretiques. Ouy, mais c'est contre vn infidele.



Et qui estoit Benhadad Roy de Syrie, qui auoit vsurpé Ramoth de Galaad sur Itraël, pour le recouurement de laquelle Iosaphat se ioignit avec Achad :

Ie dis dauantage, Que ceste doctrine va à diuiser & separer entierement la Chrestienté, en sorte qu'il n'y ait plus que guerres, que troubles, que combustions, que miseres, que desolations. Car s'il n'est point permis de se liguer, ny de s'allier avec des Princes herétiques, ie dis qu'il n'est point aussi permis d'auoir d'amitié avec eux. L'amitié est vn degré à la confederation. Pourquoy ne vous pouuez vous point allier ny liguer avec des Princes herétiques ? d'autant que l'on ne peut auoir aucune communication avec eux. Ne receuez donc plus d'Ambassadeurs de leur part ; n'en enuoyez plus vers eux ; ne souffrez point que vos peuples ayent aucun commerce, aucune correspondance avec eux ; Bref vivez comme ennemis, & vous deschirez les vns les autres. Car voila où ces Messieurs les Docteurs nous voudroient reduire petit à petit.

En l'an 1585. la feuë Royné d'Angleterre enuoya l'Ordre de la Iartiere au Roy Henry III. par le Comte d'Erbey. Il fut magnifiquement receu, carressé, festoyé. Que ne dirent point les Predicateurs seditieux là dessus ? ils declamerent publiquement contre ce bon Prince, comme contre vn deserteur de la foy, & toutesfois il n'estoit point question de Ligue offensiue, mais d'une simple demonstration d'amitié.

Difons plus, si la maxime de ceste cabale estoit fuiue d'execution, ie soustiens qu'elle rendroit les Protestans beaucoup plus puiffans qu'ils ne font en l'Europe, & ie ne ſçay ſi avec le temps elle feroit point courre fortune à la religion Catholique.

Car eſt-il pas vray que ſi les Princes & Eſtats Proteſtans ne pouuoient auoir aucune conſederation avec les Catholiques, pour leur conſeruation commune, ils ſeroient obligez de la rechercher entre eux, & l'entretenir inuiolablement, & beaucoup plus ſoigneuſement qu'ils n'ont fait iuſques à preſent; & en ce faiſant, qui en attaqueroit vn, attaqueroit il point l'autre? Et cela eſtant, que deuiendroient les diſtinctionſ dont Charles V. ſe ſeruit ſi vtilement contre les Proteſtans d'Allemagne, & dont d'autres ſe ſont ſeruy depuis, non moins vtilement pour leurs fins, ie ne ſçay ſi pour la fin?

Ouy, mais il n'eſt point queſtion ſeulement de ſe liquer avec des heretiques, mais contre des Princes Catholiques. Et que ſ'enſuit-il de là.

Les guerres qui ſe font par des Princes Catholiques, concernent elles neceſſairement la foy Catholique? l'Eſpagnol a deſſein ſur l'Angleterre, il veut enuahir ce Royaume. Dites-moy ſi c'eſt vne entrepriſe de Religion, ou d'ambition; & ſi ſur ces conſiderations le feu Roy deuoit entendre aux propoſitions qui luy eſtoient faites de la part du S. Pere en l'annee

1597. Tout ce qu'un Catholique fait, qu'il entreprend, procede-il de sa qualité de Catholique, & se rapporte-il de là.

Mais sans nous alambiquer l'esprit davantage sur tous les inconueniens que ceste doctrine anomale tire apres l'oy, voyons ce qui nous concerne presentement.

Nous voulons entrer en confederation avec le Roy d'Angleterre, le Roy de Dannemarc, les Estats de Hollande, & autres; Pourquoy cela? Est-ce afin d'enuahir les Estats du Roy d'Espagne? de le despoüiller de son patrimoine? rien de tout cela. Car ce n'est point mesmes pour recouurer le nostre, qu'il nous destient injustement; mais seulement pour empescher ses inuasions & vsurpations sur nos voisins, & quant & quant qu'il ne nous cerne & enueoppe de toutes parts, comme il a desia commencé. Or pour ce faire, avec qui nous pouuons nous vnir, sinon avec ceux qui sont conjoincts en mesmes interelts?

Que si nous les abandonnons, si nous leur refusons nostre assistance, est-il point vray que non seulement nous perdons toutes ces alliances, mais mesmes que nous les rendons nos ennemis irreconciliables, & nous exposons au mespris de toutes les nations?

L'Espagnol fait ses progrès de toutes parts; il ennuahit tous les pays voisins, il s'accroist tous les iours en puissance pour nous venir vn iour engloutir. Et sur ce que l'on dit à Rome que nous le deuons laisser faire, qu'il traueille à l'aduancement de la Foy Catholique; que nous ne



pouuons en bonne conscience l'empescher de ruiner des heretiques; nous-nous laissons bescifler par telles oisonneries, tout prests de subir son joug lors que l'on nous preschera qu'il est expedient pour le bien de l'Eglise, à fin d'opposer vne puissance esgale à celle des Turcs, & *ad maiorem Dei gloriam*. Et puis nous sommes hommes d'Estat, mais ie diray seulement, nous sommes hommes.

Or ce n'est point tout: Car si ces forces protestantes, & autres des Catholiques deniaisez, viennent à s'vnir à bon escient, & en ce faisant si elles se trouuent, suffisantes pour empescher ou retarder les conquestes d'Espagne, que feraton? Qui doute qu'on ne tasche de les diuiser? Que l'Espagnol ne tasche de donner contentement aux vns, amuser les autres, voire se confederer avec eux, s'ils le veulent; auquel cas Messieurs nos Maistres ne manqueront point d'approuuer telles confederations; Ils allegueront les exemples d'Abraham, de Loth, de David, de Salomon, des Machabees, & mesmes celuy du Pape Alexandre VI. qui enuoya son Agent à Constantinople pour traicter avec Bajazet, lors que nous portasmes nos armes en Italie pour le recouurement du Royaume de Naples; & encor celuy du Pape Boniface VIII. lequel en faueur de l'Anglois, lors nostre ennemy, enjoignit au Roy Philippes le Bel, sur peine d'excommunication, d'aller assister le Tartare contre les Mammelus. Or cela aduenant, où en serons-nous? S'il fait trefue avec les Estats des Pays bas (à quoy il traueille il y a si long temps),



s'il s'accorde avec l'Anglois, & qu'après cela il luy prenne fantaisie d'assaillir nos frontieres par mer & par terre avec ses forces, & celles de nos alliez, ou d'aucuns d'eux, aurons-nous recours à Rome, ou aux Iesuites, afin qu'ils fassent des liures pour le destourner de ce mauvais dessein? Voila donc quant à la premiere condition que l'on nous prescrit pour estre reputéz bons Catholiques, & ne point encourir l'indignation des Iesuites. Disons vn mot de l'autre.

Ce n'est donc point assez de rompre avec nos alliez, ny de les abandonner à l'Espagnol, mais il faut faire quelque chose de plus; exterminer les heretiques dedans le Royaume, & pour cét effect leur faire la guerre à feu & à sang. Car c'est ce que l'auteur de ce beau liure requiert du Roy, c'est ce à quoy il veut obliger sa Majesté sur peine de damnation eternelle: & à ceste fin il employe toutes les raisons, ou plustost les cauillations que l'impieté hypocrite a accoustumé d'aller chercher dedans la faulxe Theologie.

Mais voyons quel est le dessein de ces gens, & ce qu'ils esperent de ceste guerre. Et certes ils en esperent beaucoup de choses.

Et premierement, ils voyent que c'est le seul & vnique moyen, non seulement d'aduançer les affaires d'Espagne au dehors, mais encor de les establir & affermir au dedans, & si nous prenons garde à ce qui s'est passé depuis quelques années, nous trouuerons qu'ils ont raison.

La guerre s'eschauffant dedans l'Allemagne, dont les Iesuites estoient les allumettes, & les

affaires de la maison d'Austriche n'y estās point en trop bon estat, les partisans d'Espagne s'esueillèrent aussi tost de toutes parts, & eurent recours à tous les moyens que leurs inuentions leur peurent suggerer. Ils sçauoient que leur bonne ou mauuaise fortune estoit en nostre main; que le party, du costé duquel pancheroit la France, l'emporteroit; voire que si nous sçauions prendre l'occasion, ceste guerre ouuroit les portes d'Al'emagne à la grandeur de France. Que font ils donc? Ils cabalent à bon escient dedans nostre Estat, ils remuent tous ceux de leur faction, ils se fourrent dedans nos conseils, & dedans le cabinet mesme. Et comment cela?

Chacun sçait quelles estoient les procedures de ceux qui s'estoient saisis de la principale autorité dedans les affaires. Ils auoient esloigné de la Cour le Pere Coton, estimans ne pouuoir prendre de confiance en luy, pour estre desia engagé ailleurs; mais pour ne point offenser les Iesuites, ny ceux de leur faction, & au contraire pour se les acquerir, ils creurent qu'il falloit remplir ceste place de la mesme robbe. Ils en choisirent donc vn autre.

Le Pere Coton, à la verité, a la teinture de la societé, mais naturellement il est d'un esprit doux & poly, cét autre est beaucoup plus hardy, plus entrant, & outre ce (s'il est permis de dire vn mot de verité sans injure) il est vn peu estourdy.

Ayant donc esté introduit dedans la Cour, il estima que rien ne luy seroit impossible, & ne le

contenta point de la charge pour laquelle il auoit esté appelé, mais il voulut auoir part dedans les affaires, dedans les conseils, & mesme finalement s'en rendre maistre.

Ces gens nouueaux, qui auoient esperé se seruir de cét homme pour se maintenir en bonne opinion aupres du Roy, le laissoient faire, & luy deferoient beaucoup. Il acquiert donc vn tres-grand pouuoir, & se donne des licences nompareilles, s'entremettant de toutes choses. Et en fin que ne fait-il point ?

Nous auons parlé cy - deuant de la cause d'entrel'Vniuersité & les Iesuites, qui auoit esté appointee au Conseil en l'an 1611, *Et defenses aux Iesuites de s'entremettre par eux ou personnes interposees, directement ou indirectement, de l'instruction de la ieunesse en ceste ville de Paris.* Cét Arrest auoit esté executé, & personne n'auoit osé penser seulement de l'entamer en aucune sorte, nonobstant toutes les poursuites importunes que les Iesuites auoient faites en diuerses façons, tant durant que depuis la Regence.

Mais voyans ces gens dedans leurs liens, & qui s'estoient comme iettez entre leurs bras, ils ne perdirent point temps, ils poursuivirent ardemment la cassation de cét Arrest, & ne peurent estre arrestez, ne par le respect de l'autorité du Parlement, ne par la reuerence des loix qu'il falloit fouler aux pieds pour paruenir à leurs fins, ne par la constance mesmes de feu Monsieur le Garde des Seaux du Vair, si que finalement ils firent casser sans aucune cognoissance de cause, & sans que les parties eussent



esté ouyes, non pas seulement appellees, vn Arrest de telle importance, & donné si solemnellement par le premier Parlement de France.

Ce grand obstacle, qui auoit vn peu rallenty l'ardeur de leurs desseins, estant osté; ceste digue, qui auoit retenu quelque temps l'impetuosité de leurs entreprises, estant rompuë, vous les voyez aussi tost se ietter par tout, inonder non seulement l'Vniuersité de Paris, mais toutes les principales villes de France: vous voyez le Pere Arnould dedans le Louure, suiuy, recherché, bonneté, la porte assiegée par personnes de toutes sortes, attendans l'heure de son audience: Bref, vous voyez les Iesuites en leur splendeur & leur triomphe.

C'est donc lors qu'ils commencerent à se declarer plus que iamais, & à entreprendre toutes choses. Car outre l'autorité que ce retablissement si extraordinaire leur auoit acquis, ils auoient encor vn homme en Cour, qui estoit vn instrument fort propre pour cela.

Or d'autant qu'estant question des affaires concernans les desseins d'Espagne, il trouuoit quelquesfois de l'empeschement, ou du moins que l'on n'estoit point si souple de ce costé là qu'il eust bien desiré; il se resoult donc d'oster tous ces empeschemens, & trouua moyen par diuerses sortes d'inuentions d'introduire tantost l'vn, tantost l'autre; & finalement de ietter hors des affaires vn de ceux qui auoit esté le plus employé pour leur retablissement en l'Vniuersité.

Or voila donc le Pere Arnould, voila les Ie-



suites tous puissans. Ceux qui les auoient si fort aduancez, estoient bien auant dedans la haine publique pour les raisons que chacun sçait ; Les partisans mesmes des Iesuites n'estoient point de leurs amis. Que faut il donc faire pour se tirer delà ?

Le Pere Arnould, & tous ceux de la Cabale, leur en ouurent vn beau moyen. Il faut chasser l'heresie de la France ; Il faut exterminer les huguenots. O Dieu, que de benedictions, que d'acclamations de tous les peuples Chrestiens, de tous les Catholiques, tant dedans que dehors le Royaume ? cela non seulement effacera la souuenance de tous les maux que l'on vous impute, mais vous comblera de gloire, d'honneur & de bien-veillance à iamais. Or voila vne belle occasion pour cela.

Les Huguenots de Bearn ont fait les fols ; les autres de France ont pris part en leur folie ; sçauroit-on desirer vn beau pretexte pour leur donner sur les doigts ? Mais il ne faut rien faire à demy. Il faut faire comprendre au Roy que iamais son autorité ne sera entiere, ny son Royaume paisible, tant que ces broüillons & perturbateurs du repos public y seront tolerez. Il faut donc leuer le masque, & reuoker les Edicts de Pacification.

C'estoit vne grande entreprise, & à laquelle il n'estoit point aisé de faire resoudre ces gens par la simple consideration de la gloire & de la reputation, il falloit d'autres ingrediens plus puissans.

Il est notoire que les Rochelois, & plusieurs

autres Huguenots, font vn grand traffic en Espagne. On fait porter parole par l'Ambassadeur d'Espagne, qu'aussi tost que ceste guerre sera ouuerte, on fera saisir tous les vaisseaux, toutes les marchandises, tous les effects des huguenots François traficquans en Espagne, dont on fera tenir les deniers à ces gens de bien, non pour en profiter en particulier (cela s'entend) mais pour poursuire vne si sainte guerre. Cela fit conclurre l'affaire.

On trouue donc moyen de faire resoudre en l'intention de ceux qui tenoient le gouuernail de l'Estat la guerre contre les Huguenots, & guerre non de rebellion, mais de religion. Car l'Espagnol vouloit voir le feu allumé en tous les endroits de la France vniuersellement, & tellement allumé qu'on ne le peust iamais esteindre. Et toutesfois sur des considerations qui furent representees à ces bons seruiteurs du Roy, concernans leur interest particulier, ils changerent d'aduis, & trouuerent bon de ne prendre autre pretexte pour l'heure que celuy de la rebellion.

Le dis prendre le pretexte de la rebellion. Car encore que ceste malotruë assemblée de la Rochelle eust fait tout ce qu'une cohue de foux & d'insencez pouuoit faire, si est-ce que si les autres eussent eu la moindre volonté de les faire venir à la raison, il n'y auoit rien de si aisé. Mais ce n'estoit point leur intention, il falloit allumer ceste guerre pour les raisons qui ont esté touchées: & pour cet effect il falloit broüiller ceste assemblée; & la remplir de nouueaux soup-

gons. Et ie ne doute point que les Espagnols n'ouurissent encor leur bourse, pour donner dedans la veüe de ceux qui se pouuoient laisser mener par là. Quoy qu'il en soit, l'assemblée de la Rochelle fit ce que les Espagnols & leurs Partisans desiroient, au grand contentement du Pere Arnould, qui auoit dit quelque temps auparavant à la table d'un grand Prelat, & où il y auoit grande compagnie, qu'il craignoit bien que les Huguenots fussent trop sages, & qu'ils obeyssent au commandement qui leur estoit fait de se separer.

Voila donc l'Assemblée de la Rochelle qui s'opiniastre. Voila la guerre resoluë, Voyons à ceste heure ce qui a suivy ceste resolution, & si c'est point vne des choses qui a autant facilité les desseins d'Espagne, & aduancé ses progres. Car est-il point vray que si l'Espagnol nous eust veu en l'estat auquel nous pouuions & deuions estre: S'il eust veu les forces de ce Royaume en leur entier, non distraites, non dissipées, non prodiguées ailleurs: & quant & quant s'il eust recogneu que nous n'approuuions point ses entreprises sur nos voisins & allies, est-il point vray, dis-je, qu'il n'eust iamais osé attenter la moindre partie de ce qu'il a executé, & s'il l'eust osé que nous auions dequoy l'en empêcher & le relancer bien loing au delà de ses pretentions? Mais tant s'en faut que nous fussions en ces termes, qu'au contraire nos auortons nous faisoient consumer nos forces, nos moyens, nos finances, à nous ruiner nous memes, & employoient le credit de ceste Couron-

ne, & nostre entremise au dehors, pour faire reüssir les desseins des Espagnols & de leurs partisans. Et on void où nous en sommes.

Ce dont que les auteurs de ce meschant liure font aujourd'huy, n'est qu'en continuant le conseil qu'ils nous donnent de faire la guerre aux Huguenots, est fondé sur le mesme dessein.

Ils sçauent bien que l'extermination des Huguenots est tres-incertaine ( & ce n'est pas aussi ce qu'ils demandent ) mais qu'il est tres-certain que nous ne pouuons travailler à cela sans perdre la meilleure partie de nos meilleurs hommes, consommer nos finances & nos munitions de guerre, diuiser plus que iamais les courages & les affections des peuples, & empêcher qu'ils se puissent plus reünir ; perdre toutes nos alliances, & ouürir le chemin à l'Espagnol pour se saisir de toutes nos aduenües, & prendre tous nos dehors, pour apres nous trouuer tellement affoiblis, tellement attenez, tellement mattez, & tellement desgarnis de toutes choses, lors qu'il entreprendra de nous assaillir au dedans, qu'il ne nous reste plus ny force ny coutage, ny moyens pour nous defendre ; qui est ce à quoy ils aspirent, & non à l'extermination des Huguenots, ainsi qu'ils firent bien cognoistre à ceux par qui ils auoient fait entreprendre la guerre de l'an 1621. sous promesse de la confiscation dont nous auons parlé cy-dessus.

Car en execution de ceste promesse, ils firent saisir tout ce qui appartenoit aux Huguenots  
de



de France trafiquans en leur pays, & en firent faire inventaire montant à quelque quatre millions d'or; mais ils ne passerent point plus auât, ains voyans la guerre engagée, & que les Huguenots se deffendoient foiblement, ils leur donnerent main-leuee de tout, & mesmes donnerent à entendre à quelques-vns de la Rochelle, qu'ils ne les abandonneroient point s'ils auoient besoin de leur assistance.

Mais sondons encor vn peu plus auant la profondeur de la malice de ces gens là. Car si on fait la guerre aux Huguenots, il ne sera plus question de parler d'Espagnols, ny contre les Espagnols. Ceux qui en voudront parler seront mauvais Catholiques, ils seront Huguenots, & en ce faisant la faction Espagnole prendra l'advantage au milieu de nous; & quant aux Politiques, & aux bons François, ce sera à eux à se taire, & à s'aller cacher. N'auons-nous point veu cela en nos dernieres guerres? Furent-elles pas suivies d'un decry general des affaires des Protestans, & du surhaussement de la grandeur d'Espagne? N'ouysmes-nous point publier dedans Paris mesmes les deroutes des Protestans d'Allemagne, & les conquestes des Espagnols & de la maison d'Autriche, qui ioüioient leurs ieux pendant que nous-nous deschirions les vns les autres? Et apres cela nous nous laisserons encor conduire par les conseils de ces gens de bien? cela ne nous seroit iamais pardonné.

Certes quand il n'y auroit autre consideration que de la qualité de ceux qui travaillent si

ardemment à eschauffer ceste guerre, cela seroit suffisant pour nous faire prendre yne resolution sage, prudente & salutaire. Si ces conseils venoient de nos amis, de nos confederez, de personnes affectionnees au bien de l'Estat, & au seruice du Roy, il ne resteroit plus qu'à voir s'ils ne se trompent point : Mais si ceux qui nous donnent ces conseils sont nos ennemis, si ce sont personnes qui ayent trempé dedans la rebellion de la Ligue, qui ayent esté nourris dedans la doctrine qui l'auoit formée, & qui en couue encor vne autre; si ce sont les auteurs mesmes de ceste doctrine, & de celle qui est contenuë en ce pernicieux liure; Et si avec ces gens là ce sont encor personnes qui desirent du changement au gouvernement, qui ayent des desseins pour cela, il n'y a plus rien à deliberer.

Or il faut demeurer d'accord, que les vrais auteurs de ce conseil, sont ceux la mesmes qui ont autresfois fait la Ligue. Il ne faut point d'autre preuue de cela, que ce maudit liure, qui est le sujet de nostre discours. Il conseille non seulement ceste guerre, mais il soustient que le Roy est obligé de la faire sur peine de damnation eternelle. Demandez l'aduis des Iesuites là dessus, vous n'en trouuerez vn seul (& à peine excepte ie le Pere Souffrant) qui die le contraire, voire qui aussi tost ne s'escrie que c'est vn œuvre méritoire, & qui ne promette vne aussi eminente place en Paradis à ceux qui feront reüssir ce conseil, qu'aucuns d'eux en auoient autresfois promis à Clement, Chastel, aux assassins du Prince d'Orange, & autres semblables

monstres. Parlez en à tout le residu de la vieille Ligue, ou à ses nouveaux reiettons, & à toute ceste engeance de viperes, que ce bon liure appelle *peuples orthodoxes*, ils tressailleront de ioye; Bref, c'est le conseil d'Espagne, & de toute la faction Espagnole.

Que s'il y en a quelques-vns qui soient de cét aduis, & toutefois ne soient point de la mesme faction, ceux-là sont en petit nombre, & encor sont-ils ou trompez par les autres, & abuséz du masque de religion, ou interessez en quelque autre faction qui desire du changement au gouvernement, & qui à cause de ce procure du changement dedans l'Estat.

Mais interrogez tous les vieux Gaulois la dessus, tous ceux qui ont suiuy le Roy Henry III. lors que la Ligue le chassa de Paris, tous ceux qui ont exposé leur vie, & employé leurs moyens pour servir Henry le Grand contre les Espagnols & les Iesuites, nonobstant les foudres & excommunications de Rome, tous ceux qui ont porté vn vray dueil de la perte de ce grand Prince; bref tous ceux qui tiennent la doctrine de la Sorbonne & de l'Eglise Gallicane, touchant l'indépendance de la Couronne du Roy, vous verrez ce qu'ils vous diront, & s'ils ne croiront point qu'on nous veuille rejeter dedans les anciens malheurs, dont la valeur & la sagesse du feu Roy nous auoit tiré.

Or auons-nous examiné iusques icy les conditions, moyennant lesquelles les autheurs de ce liure nous promettent de nous laisser en repos dedans nostre Estat. Reste à ceste heure de



voir si en acceptant ces conditions, autant ridicules qu'imprudemment proposees, nous pourrions nous promettre quelque plus grãde tranquillité dedans nostre Estat à l'aduenir. Or c'est ce que ie desnie, & soustiens que tant s'en faut que pour cela nous fussions mieux avec nos ennemis, qu'au contraire nous les aurions plus puissamment sur les bras.

Et premierement, pour ce qui concerne les Espagnols, i'estime qu'il n'y a personne si simple, fust il religieux, qui se persuade que leurs desseins à l'encontre de nous aboutissent à extirper l'heresie, & exterminer les heretiques. Ce n'estoit point le sujet des guerres de Charles V, & Philippes II. contre François I. & Henry II. Tellement que se promettre que n'y ayant plus d'heresie en ce Royaume, le Roy d'Espagne n'aura plus d'ambition, ny de dessein de s'accroistre de nos ruines, & qu'il n'aura iamais rien à demesler avec nous, ce seroit estre niais par de là la niaiserie la plus stupide.

Quant aux Iesuites, & à tous ceux de leur cabale, il n'y auroit point moins de simplicité de croire que cela nous les deust concilier, ny acquiescer leur affection. Voyons pourquoy.

C'est vne opinion constante & resoluë entre tous ceux qui ont quelque espece de sens, que les Iesuites ont leurs affections du costé d'Espagne. Ils se persuadent que la grandeur d'Espagne est le fondement de la grandeur de l'Eglise, & que pour accroistre la domination spirituelle, il la faut appuyer d'une d'une domination temporelle de pareille estenduë. Sur ces ima-



ginations, ils tournent toutes leurs pensées, tous leurs desseins, & tous leurs travaux, à l'agrandissement de ces deux Monarchies spirituelle & temporelle, & consequemment à la diminution, & peu à peu à l'aneantissement de toutes les autres dominations.

Or cela estant, y a-il lieu de se persuader de pouuoir acquerir leur affection par qui que ce soit, au prejudice de ce dessein qu'on a commencé d'ourdir il y a si long temps, & auquel ces gens travaillent si actiuement, comme si leur société n'auoit esté instituee que pour cela ?

Mais passons plus auant, & considerons quel est le temperament de nostre Estat. Il n'est point diuisé seulement en Catholiques & Huguenots ; mais il y a de deux sortes de Catholiques, dont les vns s'appellent *bons Catholiques*, & quant aux autres ils les appellent *Politiques*. Il faut sçauoir d'où viennent ces distinctions, & ce qu'elles peuuent operer avec le temps.

Chacun sçait que depuis quelques siècles, il est introduit vne doctrine qui a fort diuisé l'Eglise, & a souuent commis les Princes & les Estats temporels avec les puissances spirituelles. C'est ceste doctrine, sur laquelle est fondé ce bel aduis que les ennemis du Roy luy donnent par ce mauuais liure.

D'autant donc que les Papes ont la direction spirituelle de l'Eglise, quelques esprits alambiquez dedans les speculations scholastiques, se sont voulu imaginer que la puissance temporelle leur est pareillement submise, comme estant

subordinee & assujettie à l'autre. Ceste doctrine a esté fauorablement receüe par ceux qui ne scauoient point bien en quoy consiste la grandeur du saint Siege, & quelle est la profession Apostolique; d'où est aduenü que quand il s'est rencontré des Papes qui ont eu quelque dessein particulier, ou qui auoient quelque chose à demesler avec vn Prince, ils ont pris sujet de là de le mal mener, & de brouiller merueilleusement ses Estats. Car s'estans attribuez ce pouuoir au temporel, en consequence de la puissance spirituelle, ils ont employé la puissance spirituelle pour maintenir ce pouuoir temporel, procedans par censures Ecclesiastiques contre ceux qui refusoient d'obeïr à leurs ordonnances, les effects desquelles censures ils n'ont point reserrez dedans ce qui est du spirituel, mais ils les ont estendu bien auant dedans le temporel, pretendans que les Princes excommuniez estoient descheuz de leur qualité, que leurs subiects non seulement estoient desliez du serment de fidelité, mais qu'ils encouroient les mesmes censures, s'ils continuoient de leur rendre aucune obeyssance, & en suite de ce ils ont pretendu auoir droit de disposer des Estats des Princes excommuniez, comme vaccans par forfaiture, pour les conferer à qui bon leur semblera.

Ceste doctrine a causé de tres-grands maux, & a excité des confusions tres horribles dedans la Chrestienté, qu'elle a souuent diuisé & partialisé. Car c'est cela qui a fait les *Guelphes* & les *Gibelins*, & entre nous les *Ligueurs*, que l'au-

theur de ce mauuais liure appelle , *peuples orthodoxes*, & les *Politiques*, que les mesmes auteurs appellent , *Catholiques Royaux & demy-Chrestiens*.

Or tous les vrais Catholiques & bons François, qui ont seruy fidellement les feus Roys Henry I I I. & I V. contre les Guelphes & Ligueurs, auoient merueilleusement affoibly ceste doctrine, & peu s'en falloit qu'ils ne l'eussent entierement bannie, du moins qu'ils ne l'eussent renduë muette; mais les Iesuites l'ont restablie, l'ont enseignee, & l'enseignent tous les iours publiquement avec vn tel zele qu'ils estiment ceux qui ne l'approuuent point pires qu'heretiques & Huguenots.

Or cela estant, ie dis que quand il n'y auroit ny Huguenots, ny Lutheriens en tout le monde, si est - ce que les Catholiques ne laisseroient point d'estre diuisez pour le faict de la Religion, puis que tant est que les Iesuites & leurs sectateurs veulent faire passer ceste doctrine pour orthodoxe, & tiennent pour heretiques & mauuais Chrestiens ceux qui ne la veulent point recevoir.

Et de faict, y auoit-il des Huguenots, ou des Lutheriens, du temps de Henry IV. Empereur, de Frideric I. & II. de Louïs de Bauieres, & autres ? du temps de Philippes Auguste, Philippes le Bel, & du bon Roy Louys XII ? Et toutes-fois y a-il point eu des troubles, & des guerres effroyables durant le regne d'aucuns de ces Princes, excitez sous le pretexte de la religion ? Les Papes qui estoient de ce temps-là, les ont-

ils point persecutez à toute outrances par excommunications & interdicts, & en suite ont-ils point fait soulever leurs peuples & leurs subjects à l'encontre d'eux?

Nous sçavons bien que le S. Pere, qui sied aujourd'huy heureusement, non seulement n'approuve point, mais condamne vne telle doctrine, comme estant du tout contraire à la doctrine de nostre Seigneur, & à la profession de l'Evangile. Il est Pere commun de la Chrestienté, & embrasse tous les Princes Chrestiens d'une affection paternelle; Il sçait que sa puissance est spirituelle, qui n'a aucun droit sur la puissance temporelle des Princes seculiers; Mais outre que nous n'avons point lettres que tous ceux qui viendront apres luy ayent les mesmes sentimens, aussi sçavons-nous qu'ils ne sont point tousiours maistres absolus de leurs bonnes intentions. Ils sont souvent violentez, & sont plus ou moins qu'ils ne veulent.

Il y a plus (& il faut icy que ie m'explique, ie parle en vray Catholique instruit à distinguer entre la puissance spirituelle & seculiere) ie dis donc que les Papes ont deux personages à soutenir, & qui sont fort differens l'un de l'autre, & lesquels toutesfois s'entr'aydent mutuellement. Entant que Papes, ils sont successeurs de saint Pierre, qui a enseigné vne doctrine de paix, d'humilité, de charité, & de toutes perfections Chrestiennes. Entant que Princes temporels, ils ont leurs desseins temporels, non seulement pour la manutention, mais encor pour l'augmentation & accroissement de leur domination



nation temporelle, & font seruir à cela tout ce qui depend d'eux, mesmes le glaue spirituel. Je me contenteray d'un seul exemple. Il n'y a personne qui n'aduouë que le Pape Clement VIII. a esté vn grand & saint Pape, il n'y a personne aussi qui ne sçache ce qui se passa de son temps pour le Duché de Ferrare. Le Pape prétendoit qu'il estoit deuolu, & retourné au saint Siege par le deceds d'Alphonse II. qui en auoit laissé la possession à Dom Cesare d'Este son parent, & qu'il auoit institué son heritier. Le Pape l'en veut depousseder. Il leue vne armee pour cela, & pour faire reüssir plus facilement ses intentions, il excommunie Dom Cesare & toute sa maison, & prend l'affaire si à cœur, qu'il proteste en pleine assemblée des Cardinaux, que pour venir à bout de son entreprise il y mettra iusques au dernier Calice de l'Eglise, & mesmes ira mourir dedans les fossés de Ferrare avec le saint Sacrement entre ses mains. Je demande si en vne querelle d'Estat, telle qu'estoit celle d'entre le Pape & Dom Cesare, il falloit asseoir les armes spirituelles, & employer iusques au dernier Calice de l'Eglise, & au S. Sacrement? Or cela soit dit, pour monstrier que les plus saints Papes, quand il est question de leurs interests temporels, ont leurs affections & leurs passions, qui ne sont point tousiours conformes à leur qualité de Papes.

Cela presuppôsé, si pour des considerations temporelles, quelque saint Pere venoit à auoir vne affection particuliere pour l'Espagne, ou pour quelque autre qui ne fust point en bonn

intelligence avec nous, & qu'à cause de ce il ne nous traictast point avec égalité, ou mesmes qu'il se ioignist avec nostre ennemy contre nous; ou que cessant cela, il entreprist pour des considerations spirituelles de vouloir toucher au temporel de nostre Estat, qui est ce dont ce mauvais autheur nous menace, & qui n'aduendra jamais, Dieu aydant; mais si cela aduenoit, est il point vray, qu'il se seruiroit des mesmes armes, & des mesmes procedures que ses predecesseurs? Et en ce cas, quelles autres defences aurions-nous que celles de nos maieurs? Que celles de Philippes le Bel, de Louys XII. & autres? Et lors de quel costé seroient les Iesuites? Pour qui tiendroient leurs nourrissons? Et dequoy seruiroit de les auoir voulu reblandir, de s'estre soumis laschement & abjectement à leurs volontez, sinon de les auoir rendu plus hardis, plus puissans, & plus autorisez pour resister au Roy, corrompre ses subjects, & les faire soufleuer contre luy? d'auoir fortifié l'audace de leurs sectateurs, & affoibly au contraire le courage des gens de bien, de ceux qui ont les sentimens vrayement Catholiques, & François; & en vn mot, de tous ceux qui craignent Dieu, & honorent le Roy? Certes c'est la grande faute, en laquelle tant de gens sont tombez. Toutes ces submissions ne seruent qu'à augmenter l'insolence des meschans, & à diminuer l'autorité & la puissance du Prince. Remettons-nous devant les yeux l'histoire du Roy Henry III. Elle nous doit servir d'un bien,

ample commentaire sur ce sujet. Je n'en diray plus qu'un mot.

Les Estats des Pays-bas recherchoient sa protection; & pour cét effect en l'an 1585. ils enuoyerent leurs Ambassadeurs, avec toutes sortes d'offre de submission, d'obeyssance, & de subjection. Le Roy se trouue empesché, il se fasche d'un costé de refuser de si belles offres; d'autre costé il crainct de les accepter. Il veut auoir l'aduis de quelques vns de ses seruiteurs, & particulièrement de l'Euesque d'Aqs, qu'il cognoissoit d'un tres-grand sens, & d'une grande experience en tels affaires. Ce grand Prelat luy dit son aduis avec franchise, & luy donna un conseil, que le Roy iugea luy-mesme tres-salutaire. Et toutesfois il en fut aussi tost destourné par d'autres, qui s'estoient laissez instruire par les Agens d'Espagne, lesquels luy ayans representé la consideration de la religion; Que le Roy de Nauarre, & les Huguenots qui estoient dedans son Royaume, en prendroient aduantage; Qu'il auroit le Roy d'Espagne, & toute la Ligue sur les bras; Ce Prince, quoy que tres sage, se laissa persuader, & ayant franchy le sault, se trouua tellement engagé, qu'il luy fut impossible de se desueloper de ces liens, & fut contrainct de rompre ses Edicts de pacification, de chasser ses subjects de la Religion pretenduë reformee hors de son Royaume, de se faire chef de la Ligue, & declarer la guerre au Roy de Nauarre, & autres Princes de son sang. Et que gaigna-il pour cela? Recoura-il l'affection de ses peuples desbauchez & insatuez des.



charmes d'Espagne? Les Iesuites se tournerent-ils de son costé? Le Roy d'Espagne se departit-il de ses pratiques? Au contraire, ils firent tomber ce pauvre Prince dedans la haine des vns, & dedans le mespris des autres, qui par ce moyen tirerent toute la puissance à eux, & finalement porterent les affaires au point où nous les auons veu.

Pour donc me recueillir sur ce point, ie dis que quand vous ferez la guerre aux Huguenots, que vous les chasserez de toutes les villes, que vous donnerez mesmes leurs confiscations aux Iesuites, vous ne vous deuez neantmoins rien promettre de la part, ny des Iesuites, ny de leurs partisans. Si vos efforts ne reüssissent point, & que vous soyez contraint de faire la paix, ils redoubleront leurs plaintes; si vous la continuez foiblement, ils vous auront en mespris, & prêteront de plus en plus l'oreille aux mauuais conseils de vostre ennemy; & quand mesmes vous seriez venu à bout des Huguenots; que vous les auriez exterminés du Royaume, qui n'est point la besongne d'un iour, si est-ce que pour cela vous n'auriez point beaucoup aduancé. Car si apres cela vous n'imposez silence aux Politiques, si vous ne rayez & condamnez l'article du tiers Estat, touchant l'indépendance de vostre Couronne; si vous n'adorez la puissance temporelle du Pape; si vous ne receuez le Concile de Trente en tous ses chefs; si vous n'establissez l'Inquisition; si vous ne renoncez à vos appellations comme d'abus, & à tous les priuileges de l'Eglise Gallicane; si vous n'exemptez



les Ecclesiastiques de la iurisdiction seculiere en toutes causes; si vous n'obeyssiez absolument au Pape en tout ce qu'il vous enjoindra, fust ce mesmes de vous assubjettir au Roy d'Espagne, & luy quitter non seulement le tiltre de Roy de Navarre, mais celuy mesme de Roy de France, & finalement si vous ne souffrez d'estre le iouiet des Iesuites & des caffars, vous n'aurez rien fait, vous ne serez point bon Catholique, vous serez heretique.

Grand Roy, que Dieu a esleué au thrône de vos ancestres, dont ces docteurs de rebellion, d'assassinats & de parricides, ont tant fait d'efforts pour vous exclurre, & vous ont persecuté si furieusement dedans les reins du feu Roy vostre pere; Grand Roy, à qui Dieu a donné vn esprit si excellent, & vn iugement si solide, pour sçauoir discerner entre les bons aduis de vos fideles seruiteurs, & les aduertissemens & conseils artificieusement infideles de vos ennemis, par les illusions desquels ils ont cy deuant perdu de si grands & si aduisez Princes; Grand Roy que Dieu a doiüé d'vn si genereux courage, & d'vne telle magnanimité, pour ne point souffrir de diminution en cette grande & puissante Monarchie, de laquelle il vous a commis la garde; Souffrirez-vous que ceste malheureuse cabale continuë de semer ceste si dangereuse & si maudite doctrine, qui a pensé transporter vostre sceptre à vos ennemis, & qui vous a proditoirement rauy le feu Roy vostre pere, sur le poinct del'exécution de ses grands & genereux desseins, pour la grandeur de vostre Royaume,

& l'affermissement de vostre regne? Souffrirez-vous que des traistres & scelerats, deuouiez à la ruine de vostre Estat, & à la dissipation de vostre Couronne, osent encor vous donner des aduis & conseils de sang à l'encontre de ceux, en la fidélité desquels le feu Roy vostre pere a trouué son principal appuy contre les conjurations de ces desloyaux? Et finalement, souffrirez vous que vos bons & fideles subjects, qui ne font autres vœux que pour la prosperité de vostre Majesté, pour le salut & la gloire de vostre Estat, pour le repos & tranquillité de vos peuples; qui ne recognoissent autre domination, ny autre puissance temporelle que la vostre; qui ont exposé leur vie, leurs biens & leurs fortunes pour le seruice des Roys vos predecesseurs, & de vostre Maïesté, gemissent dauantage sous l'oppression de ces meurtriers, de ces incendiaires & boutefeux execrables, qui conjurent par ce maudit escrit tout ce qu'il y a de meschant & de scelerat sur la terre contre la personne Sacro-saincte de vostre Majesté, & contre son Estat.

La cabale (car ie ne parle que de ceste canaille, & non des abusez & des innocens) nous appelle Politiques, Catholiques Royaux, demy-Chrestiens. Que maudits soyez-vous instrumens d'enfer & du diable, qui auez pris à tasche de destruire tout ce qu'il y a d'ordre, de *Police*, de pieté, de religion, de sincerité, & de veritablement Chrestien parmy les hommes; qui empeschez les desloyaux de rentrer au giron de l'Eglise, en laquelle ils voyent que des gens si

perduëment meschans, & si esloignez de la profession Chrestienne, ont vsurpé tant de pou-  
 voir. Qui exposez mesmes le S. Pere à la haine  
 & au mespris de ceux qui le font separez d'avec  
 nous, ayans l'impudence de nous menacer de  
 son indignation par ce meschant liure, comme  
 s'il estoit le ministre, ou plustost l'esclau de  
 vos passions forcenees. Et puis vous nous par-  
 lez des Huguenots, vous dites qu'ils sont pre-  
 judiciables à l'Estat, qu'il les faut extermin-  
 er : & quelle comparaison y a-il entre eux &  
 vous?

Ils nous ont broüillé quelquesfois, Ils ont  
 causé quelques tranches à cet Estat, & mes-  
 mes aucunesfois quelques fiebvres. Mais le plus  
 souuent apres auoir esté prouoquez à cela par  
 vos artifices malicieux, par les mauuais traite-  
 mens que vous leur procuriez. Mais ont-ils ia-  
 mais assailly le cœur? Ont-ils iamais attaqué  
 les parties nobles, comme vous? Ont-ils ia-  
 mais eu dessein de briser le Sceptre, d'arracher  
 la Couronne de nos Roys, ny d'attenter aucun  
 des actes abominables, qui sont vos princi-  
 paux exercices, & qui sont que plusieurs d'en-  
 tre eux, qui d'ailleurs ne sont aucunement esloi-  
 gnez de la communion Catholique, nous ont  
 en execration, & blasphement contre l'Eglise  
 à cause de vous? Mais au contraire se sont-ils  
 point jointz avec nous pour maintenir nos  
 Roys dedans leur thrône, pour resister à vos  
 rages & à vos fureurs, & en empescher les per-  
 nicieux effects? Et si vous veniez encor aujour-  
 d'huy à bout de vos pernicieux desseins, & que

vous peussiez rallier la detestable Ligue, apres laquelle vous trauallez si ardemment, de qui pourrions-nous estre plus fidellement secondez que d'eux ?

Mal-heureux, si la clemence du Roy tant de fois offensée par vos attentats, fait vne fois place à sa Iustice, on vous empeschera bien d'executer vos damnables intentions, ny d'espandre cy-apres par escrit, ny autrement, vne doctrine si execrable, inuentee pour ruiner les Estats les plus florissans en vraye pieté & devotion.

F I N.

